

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ إِلَّا اللَّهُ مُحَمَّدٌ رَّسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

12 Avril 2019

05 Shabaan 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

LAQUEL JIHAD ?

Le *jihad* li ene devoir religieux, ene acte de foi, ki fine prescrire dans Quran Shareef pour tous bane musulmans. Mais malheureusement, d'ene côté bane musulmans pas bien conne bane l'enseignements de l'islam couma bizin, spécialement lor sa sujet de *jihad* là et de l'autre côté, bane non-musulmans ena tellement ene mépri pour sa bane l'enseignements là ki bocou de bane mauvais conception et fausses l'idées fine vine dans zot l'esprit lor l'islam et so bane l'enseignements, et plus particulièrement lor le sujet de *jihad*.

Pour bocou dimounes, zot trouve sa pratique là tout à fait légitime pou appelle tous bane la luttés, tous bane la guerres ki vize à régler ene conflit kot zot propre l'intérêt en jeu couma *jihad* (la guerre sainte) – et là, tous bane moyens, même bane ki pli condamnables zot paraite bon dans zot lizié. Pour ene non-musulman li, li fine mette sa dans so l'esprit depuis bien lontan ki *jihad* veut dire la guerre sainte contre bane non-croyants, pour la propagation de l'islam. Alors, mo fine trouver ki li nécessaire – à travers sa série de Khutba lor *jihad*, terrorisme et l'islamophobie – pou révine lor bane sources de l'islam, à travers Quran Shareef et bane *Sunnat* du Saint Prophète (saws) pour expliquer saki *jihad* été vraiment,

afin ki bane *Ulul al Baab* et bane dimounes avec l'esprit objectif capave compran la vérité lor là.

Le terme *jihad* li dérivé de *jahada* ki veut dire faire bane zefforts intenses ziska atteindre pli grand limite ki ena. (Al-Ankabout 29 : 7). Le *jihad* li ene injonction tellement important pour bane musulmans, ki sa fine mentionner en pas moins de 36 places dans Quran Shareef.

En fait, li tellement important ki tous bane actes de foi ki fine prescrire pour ene croyant (Par exemple, Salaat, Roza, Zakaat, et Hajj dans Makkah) zot bane exercices spirituels ki destiné à vaincre bane faiblesses d'ene dimoune et pou prépare li pour l'accomplissement du *jihad*. Le *jihad*, tel ki li apparaite dans la lecture du Quran Shareef, montrer nous trois types de combats :

- 1) Le combat contre nous propre *nafs*.
- 2) Le combat contre le mal dans tous so bane formes.
- 3) Le combat armé contre l'ennemi visible (ki nous capave trouver et ki pé rode faire nous du tort, ki envie attaque nous).

Nous capave différencier entre sa trois types de *jihad* là, kot nous appelle zot premièrement **Jihad-i-Akbar** (le plus grand *jihad* ou le *jihad* suprême), **Jihad-i-Kabir** (le grand *jihad*) et le **Jihad-i-Saghir** (le ti *jihad*). Le Saint Prophète de l'islam (saws) ti considère **Jihad-i-Akbar** comme étant le plus grand combat, le plus noble et li fine dire, kan li et so bane troupes ti retourner de l'expédition de Tabouk : « *Zot fine accompli le ti jihad, astaire là ena le plus grand jihad (ki zot bizin faire).* »

JIHAD-I-AKBAR :- Sa c'est ene combat ki tous les temps nous bizin contigner faire contre nous-mêmes, contre nous propre *nafs*. Li ene la guerre, ene combat ki zamais fini et ki nous bizin contigner faire, kot nous lutte contre nous *nafs* so bane mauvais tendances et inclinations. Li pas faire référence à ene combat de l'Etat (c'est-à-dire, d'ene pays ou gouvernement, surtout ene pays ou gouvernement islamique), mais d'ene la lutte ki ene dimoune bizin faire avec li-même, contre so bane mauvais passions, contre so bane instincts primitifs, couma l'infidélité, l'adultère, mensonge, malhonnêteté et matérialisme. L'Etat ena néanmoins l'obligation pou aide so citoyen dans sa combat là, en créant bane conditions propices à la purification interne de sa dimoune là. L'Etat ena le devoir pou

débarrasse l'environnement social de tout bane obstacles ki capave vine ene l'obstruction dans sa dimoune là so chemin, dans so zefforts ki li faire pour ki li atteindre la pureté intérieure (Par exemple, la vente de bane la boissons alcoolique, la drogue, bane pratiques immorales et le jeu du hasard).

Le Saint Prophète (saws) fine dire : « *La pureté (propreté) c'est la moitié de la foi* ». Sa pureté là veut dire la pureté de l'esprit. D'après mo analyse, ene l'âme ki encombré de bane désirs malsains, alors sa kalité l'âme là Allah prive li de So la grâce. Kan ene dimoune li purifier so l'âme de tous bane mauvais inclinations, alor li accomplir sa *jihad* ki nous appelle le plus grand *jihad* et li atteindre la moitié de la foi kan li rende li digne pou recevoir la grâce de so Créateur et pou prend et marche lor le chemin du progrès spirituel.

JIHAD-I-KABIR :- Sa li ene combat ki ene dimoune entreprendre contre tout saki malfeuzan et malsain, et saki étranger à li. Le Saint Prophète (saws) fine gagne l'ordre de la part d'Allah pou engage li dans sa *jihad* là: « **Ô prophète ! Lutte contre bane mécréants et bane hypocrites. Et agir sévère envers zot.** » (At-Tauba 9 : 73).

Sa verset là constituer ene l'appel sans équivoque au *jihad*, mais li pas mentionne servi bane z'armes. Le Saint Prophète (saws) ti certainement engagé dans bane la guerres défensives contre bane non-croyants de Makkah, mais zamais li fine prend z'armes contre bane hypocrites de Madina, même après zot trahison dans bataille Uhud. Li donc clair ki *jihad* ki fine mentionné dans sa verset là (At-Tauba 9 : 73) li pas le *jihad* armé ki pé mentionner.

Allah dire le prophète (saws) : « **Donc, pas obéir bane mécréants (bane non-croyants) mais engage contre zot ene grand la lutte à travers sa Quran là.** » (Al-Furqan 25 : 53).

Dans sa verset là, Allah fine ordonne le Saint Prophète (saws) pou la guerre avec le plus puissant de bane z'armes, c'est-à-dire, parole Allah (le Quran), et sa démontrer le véritable objectif de *Jihad-i-Kabir*. C'est ene combat noble, ki consister dans explique la beauté de bane l'enseignements du Quran Shareef et pou invite bane dimoune vers l'islam. Au niveau d'ene dimoune, c'est ene combat ki li pas pou réussi maîtriser et gagne le dessus avec succès tanque ki li

pas fine réussi accomplir le *Jihad-i-Akbar* (le combat contre li-même, contre so *nafs*) avant sa.

En passant, mo bizin dire ki contrairement à ene croyance bien répandu parmi bane non-musulmans, zamais bane croyants (musulmans) fine gagne l'ordre pou servi z'armes pou propage l'islam. L'islam li riche en arguments convaincants et sa pou ene insulte lor li pou penser ki li bizin servi la force pou fer dimounes accepter li. D'ailleurs Quran-même li garant de la liberté de la foi : « **Pas ena aucaine contrainte dans la foi/ religion.** » (Al-Baqara 2 : 257).

JIHAD-I-SAGHIR :- Sa c'est le *jihad* mineur, et li concerne principalement l'Etat. Allah dire dans Quran Shareef: « **Permission (pou la guerre) accordé à bane contre ki la guerre fine faire, parski zot fine être traiter injustement et Allah (swt) ena assurément le pouvoir pou aide zot.** » (Al-Haj 22 : 40).

« **Bane ki fine injustement gagne poussées de zot bane la cazes, seulement parski zot dire : 'Nous Maître c'est Allah'.** » (Al-Haj 22 : 41).

Ena ene consensus parmi bane critiques (de l'islam) ki verset 40 li le premier verset kot bane musulmans fine gagne la permission pou ena recours à bane z'armes pour zot défense. Ena bane indications fermes ki sa verset là fine révélé peu après l'émigration forcé du prophète (saws) vers Madina (*Hijrat*). Verset 41 soutenir sa hypothèse là, parski li confirmer ki permission pou la guerre fine accorder après ki bane musulmans fine gagne pousser de zot la cazes.

Verset 40 dicter le principe selon lequel ene la guerre défensive capave être engagé, et c'est sa principe là ki fine dirige ene ti groupe de bane musulmans ki mal équipés pou rentre dans ene conflit contre ene l'armée de bane Mecquois ki ti bien organisé : parski sa ti groupe de bane musulmans là ti gagne mauvais traitement et zot fine subir bane agressions.

Verset 41 donne nous deuxième raison kifaire zot fine gagne permission pou prend z'armes : parski zot fine injustement gagne poussée de zot la cazes, zis à cause zot la foi ti différent avec celui de bane ki fine opprime zot. Sa bane là (bane non-croyants, bane oppresseurs là) fine harcèle et torture zot zis à cause zot pas fine capave tolère la foi de bane musulmans. Ene troisième verset permette à bane musulmans pou contigner la guerre pour rétablir la liberté de la religion (de

la foi) et la liberté d'expression, kot sakaine ena le droit pou ena so propre croyance et so bane propres l'idées.

Allah dire dans Quran : « **Et combatte zot ziska ki népli ena persécution et ki la religion (la foi) li vine pou Allah seul.** » (Al-Baqara 2 : 194).

Pour résumer, nous capave dire ki le *jihad* suprême li transforme l'homme en ene élu d'Allah ; le grand *jihad* dirige li, par amour pour bane dimounes couma li, pou invite zot dans le chemin d'Allah et le ti *jihad* permette li pou conserve/ préserve saki li fine acquérir en termes de biens, de droits et de libertés. Le plus noble c'est ki nous amène ene combat contre nous bane l'instincts primitifs et ki nous propage la parole d'Allah et dans bane cas extrême, pour défendre nous. Allah fine donne nous le droit pour la légitime défense ; Li fine donne nous droit pou combatte nous bane oppresseurs si bane là vine de l'avant pou fer nous du tort et c'est à juste titre ki le combat armé fine être qualifié couma ene tipti *jihad*.

Concernant le conflit armé, l'islam fine permette li seulement pour ki bane musulmans capave défendre zot bane dibiens, zot pays et zot liberté pou pratique zot la foi. Rien d'autre. Aucaine les autres la guerre pas toléré. Alor eski li encore feuzabe pour bane dimounes pou taxer l'islam (pou mette lor lédos l'islam) couma ene religion ki encourage et prêche la violence ? Nous bizin absolument faire la démarcation, la différence entre saki l'islam prêcher vraiment et saki bane islamistes pratiquer, et c'est là deux réalités différents. Sa amène nous à ene l'autre question : bane soi-disant *jihad* ki lancé de temps à autre, eski zot rentre dans catégories de bane l'enseignement de l'islam ? Eski l'agression de l'Irak contre l'Iran ti ena ene but défensif, eski li ti bizin défendre li en face d'ene l'oppression ki vine de l'Iran ?

D'après mo l'opinion (ki mo présente devant zot en toute humilité), bane sel *jihad* ki valables de nos jours, c'est *jihad* de bane palestiniens, de bane peuples de Bosnie et Kosovo, de bane Musulmans de Myanmar – bane *Royingyas* ; parski zot fine gagne pousser de zot la cazes et pays et zot fine bizin subir toutes sortes kalités persécutions. Donc, tous bane musulmans ki opprimé à cause de zot la foi, c'est zot ki fine gagne permission pou faire le *Jihad-i-Saghir* pour défendre zot la vies, zot bane droits et zot libertés. Avec bane Karadzic et bane Milosevic de sa lé monde là, pas capave ena ene l'autre dialogue ki celui de bane z'armes. Bé selman, mo bizin dire zot, faudé aussi, dans contexte de l'islam et de saki l'islam

prêcher, faudé ki sa permission pou engager dans ene la guerre sainte li vine de l'autorité suprême, et c'est zis ene Messenger d'Allah ki capave donne sa permission là (sous l'instruction divine). Eski nous capave imaginer ki kan l'islam ti arrive à so sommet, ki *jihad* déclencher sans la permission du Saint Prophète (saws) ou celui de so bane califes bien-guidés (*Khulafa-e-Rashideen*)?

Nous bizin admette alor ki le monde islamique pas pou capave fonctionner complètement sans ene Messenger d'Allah. Soit la Communauté (*l'Ummah*) li dirigé par ene Messenger d'Allah – [Kot bane musulmans bizin gagne la ferme conviction ki la porte de la venue de bane prophètes (non porteurs de loi) pas fermé et ki la porte de la révélation divine li toujours ouvert et ki Allah pou protége toujours So religion et *l'Ummah* de So bien-aimé prophète Muhammad (saws) en envoyant ene de So bane serviteur choisi] - ki prend bane décisions ki bizin selon bane exigences de l'heure. Et donc bon nombre de bane kitchoses, banes conflits armés entre autres, zot simplement interdits dans so l'absence (et sans so permission). Ena là matière à réflexion pour bane ki envie réfléchi lor là.

Ki Allah gagne pitié de bane musulmans et l'ensemble de l'humanité et aide nous tous pou bien comprend le bien fondé de l'Islam et ki Allah inspire nous la foi et aide nous pou marche toujours lor le droit chemin. *Ameen*.